



### Tuanku Canselor Tuntut Graduan Kreatif dan Inovatif Penuhi Kehendak Pelanggan



*Tuanku Canselor, Sultan Sharafuddin Idris Shah bergambar bersama penerima Anugerah Universiti selepas sidang 1 sesi 1 Majlis Konvokesyen UPM ke-34 pagi tadi.*

**SERDANG, 9 Oktober** Tuanku Canselor Universiti Putra Malaysia (UPM) menuntut para graduan lebih kreatif dan inovatif untuk memenuhi kehendak pelanggan bagi menghadapi persaingan dan mengubahsuai pengurusan.

Sultan Sharafuddin Idris Shah bertitah graduan yang pandai menggunakan kemahiran mereka dapat merangsang pertumbuhan ekonomi dan meningkatkan kualiti hidup rakyat.

Baginda menasihati graduan supaya menjayakan program transformasi negara untuk meraih status negara berpendapatan tinggi.

"Beta yakin para graduan mampu menyokong usaha kerajaan mencapai matlamat Model Baharu Ekonomi.



*Baginda Tuanku Canselor menyampaikan Ijazah Kehormat Doktor Falsafah Dalam Bidang Pentadbiran Awam kepada Yang Berbahagia Tan Sri Dato' Seri Dr. Haji Zainul Ariff Haji Hussain pada Majlis Konvokesyen UPM ke-34 yang telah berlangsung di Pusat Kebudayaan dan Kesenian Sultan Salahuddin Abdul Aziz Shah (PKKSSAAS).*

Mereka juga harus mampu menghadapi persaingan dan menampilkan daya tahan yang

tinggi," titah baginda pada hari pertama Majlis Konvokesyen UPM Ke-34 di Pusat Kebudayaan dan Kesenian Sultan Salahuddin Abdul Aziz Shah (PKKSSAAS), UPM.

Sultan Sharafuddin memuji UPM dapat menerap konsep universiti penyelidikan dengan berkesan dengan memberikan impak terhadap kemakmuran bangsa dan negara secara komprehensif.

Pada istiadat itu baginda berharap Tan Sri Dato' Rozali Ismail yang dilantik semula sebagai Pro-Canselor UPM memberikan khidmat cemerlang untuk menjadikan UPM bertaraf dunia.

Tuanke Canselor juga mengumumkan graduan Doktor Falsafah (Ph.D) UPM seramai 256 adalah yang tertinggi berbanding semua institusi pengajian tinggi di Malaysia.

Pada majlis yang sama, baginda berkenan menganugerahkan Ijazah Kehormat Doktor Pentadbiran Awam kepada mantan Lembaga Pengarah UPM, Tan Sri Dato' Seri Dr. Zainul Ariff Hussain atas pengalaman beliau yang luas dalam bidang pentadbiran awam.

Sesi pertama pada pagi 9 Oktober menyaksikan baginda mengurniakan Ijazah Doktor Falsafah (Ph.D), Ijazah Sarjana, Ijazah Sarjana Muda dan Diploma kepada 614 graduan sementara sesi kedua pada sebelah petang seramai 704 graduan menerima ijazah dan diploma daripada Pro-Canselor UPM, Tan Sri Dato' Dr. Nayan Arifin.

**Berita ini disediakan oleh Seksyen Media, Bahagian Komunikasi Korporat UPM. (Noor Eszereen Juferi 03-89466013, Unit Foto BKK 03-89466199).**